

cuicatl y ycaçan nello huaye çan yetochoquizi çan yeto tlaocol y, ynnemiaychany maiuhquimat amoyol antepilhua yo ayahue.

Yanticchimal y cuiloa tocontlacoeh yheuiloa a intepillotl a intlachinolli ya niman yeoncan timopotonia tiçatica in yetimoxconoa ha intlakahuepa huiya yea toyao quenonamica huiya a huay hua ya ohuaya aye ahuayio ya.

Oancayetinpatih inteteuctina in tlaca huepa huiya incamacpa tontlatoa ye huaya mitzoya nanquilia quahunquechol intototl ye huan maceuh quiya mapipitzo aya o anea yeonca quenonamican huiya ahua y yao &.

Ocelo ihcui liuhqui amocueic quahuintzetzeluhtoc moxochiuh aya intinopiltzin yehuan maceuhquiya chimalcocomaya mohuehueuh ticyahuelintzotzona a huay yao.

Çan tie quahui xochilacatzoa ye ehuayantepillotl mieniuhyotl yehuan maceuh quiya cacahua octli ya ontei huintia ontequimiloa ye yehua incuic ye yehua yxochiuh ycomochiuhua quenonamican ymache ehua in Mexicay ahuay yao &.

Moyolic çantimahui noyollo ahton motlahpaloa yeoncanahuiltlon Dios ohuaya aye huiya.

Çanel atoyaz inompa ximoa yeoncan aya xomiquani yeoncan ahuiltlon Dios ett^a.

Nic cecemeltia noyollon ypalnemoa nieman a moxochiuh nic heua mocueic aya maocuelachic nimitzonahuilti quen manian tontlatzihuiz y quac ti nechon motlatiliz iquac non miquiz y yao.

Yncuix aoc ylotiz moyollon ypalnemoa niema namo xochiuh ett^a.

Çantieneneloa ahticenquixtia ycelteotl ypalnemoani çan on neminpaqui çannonnem in huelamatin tlpc. yenican ycanichoca ni icnotlamatia ohuaya ohuaya.

Çan mochinquitoa noyollo mochinquilnamiqui ixquich ahtahua ay ati huelamatih ica nichoca nicnotlamatia ett^a.

Mach noyocollo intlpc. y Dios ytlatol huelon nemo ay timotolinian ti nechcocolian çaxi nentlamat a ohuaya ohuaya.

Çan no huian temolo ohuaye çannohuian notzalo ontzatzililo yatemolo ytlatol huelon nemoa y timotolinia ett^a.

Quenin tiquittoa yai celteotl ypalnemoani ayaoc cemilhuatl y motloc monahuac y incuix aoc nello ninotolinia y yao y yahue ohuaya &^a.

Ycanel oc nomatia monamiquiz yxopan xochitl y ya incanel ocnomati an euponiz y yexochitl y yempoalxochitl y yao y yahue ohuaya &^a.

Tamoan nempoyon inquechol huia nocon ehua ya ye tamoan ychan y moyol amox y yehuan Dios yemocueic ohuaya ohuaya.

Çancatehuatl huelticmati iniconme huaya ycaonmitoa yehua ictonteyh cuiloa ictontenonotza yenican y moy ohualamox y &^a.

Ancaçan totlaocol y yehuaya y caya om momalina intlaçopilli yehuan dios ye mocueic ohuaya ohuaya.



Ahuillotl ymachtiepolo tehuazque otiaque yenica huiya icniuhthuaquiuh toxochipapac yec ic ni huani matonahuiaca ohuaya ett^a.

Yn maoc ompapaquin toyollo yehuaya antoenihuan y tiazque ye hua ohuaya ohuaya.

Aequimatin Axcan moztlan huiptla ya caçoctaque y matellelon qui ça mati-quil nami quican cuix nellinti ya nemico ohuaya ett^a.

Titloque tinahuaque Dioc tonienih tlatzihuiz tona hahuiliz tlatzihuiz tlpc. aya tie ehua mocueic aya iuhquimatintoyol a ohuaya &.

Ycelteotl ypalnemoani ticiehuiz tontlatzihuiz titechon motlatiliz ayayuh qui-matin toyol a ohuaya ohuaya.

Y çantiepietnemico intlpc. y tontiximatico in huehuetitlan y titoc niuh a huiya yça actle ye yaz yça atleic ompolihuiz a intlaltiepac a ohuaya ohuaya.

Ayac tlaquahuac ayac tlaçotli conayachihua ypalnemoani quauhtlin patlan-tiuh y yollo intepetl ocelotl ynotlacoti noyauh innica o huaya ohuaya.

Çan coçahuic ocelotl y yehocaticaca yahue a iztaequauhtli yamapipitzoa yei-ehan xihuitl popoca y tlaçao yehuan in huexotlalpan y intepilhua huiya chichi-mecatl teuctli a in coxanatzin nopiltzin o tlamayotzin teuctla ohuaya &.

Ymaon netlanehuilo y ye ehua çan cocomocaticac y teocuitla huehuetl tztzilicaticac o mixcohuan calitec ay yahue a nochipateuctihua yenica huiya a nochipa teucyotl mahuiçotl tlatocayotl o antepilhua ycan achicoo çan cuelachic a yntinemi yenican ohuaya ohuaya.

Tiçayo ynamohuehueuh o antepilhuan y an Mexica ye ehua anoncan yaicac y ixtlahuatl itic yeoncan aynitzquemeca huiya in quahuixochitica malintiac y atac con nequi ohuaye quauhtin ocelotl ohuaya &.

Yçaneanima yehua con tzotzonque o aintepilhuan nicecepaticatzin intezca-zin huiya inquahuixochitica malintiac y atac con nequi &.

Quahutli nechihualoc huiya ocelotl yeneuepaloc aintepilhuan y nepopayahua-loc nequauhtzetzelolo ynixtlahuatl ytecy canaca ac con nequi ye hua initlacnelil yehuan dios ipalnemoani aquin con huel matiancuelachic ay çaye con mocniuhua maontlaneltocoya ohuaya ehua.

Oceloxochitl oncuepontoc yeonca huiya itzimiquilxochitl huehuelixtimani aixtlahuatl itecy aynatl ixcoya ohuaya &^a.

Çan mixcohuan calitec ayehuaya amapanecalco mocueicatia yehual motza-tzilia in tlaca huepantzi ixtliluechahuac cuica nahuatilo yeon nahuatilo ynic-niuhyotl aya yhuan nahuatilo yntepillotl a ohuaya &.

Quen huel xoconchihua quen huel xocon yanenequi ynixochiuh in Dios a mopal-nemoani mopal tiyanemico y tlpc. y timacehualti quexquich on mania moquahui xoehineuiltonol a noyollo mamahui que non aciza ohuaya ohuaya.

O achiyeiuhca ixtlahuaca tlachinolitic y chimalteuhtli yehuaya chimal coco-

mocaya tlacochtli pixahuintzetzelihui yehua noyollo mamahui quen nocaciz a ohuaya ohuaya.

Çanijo in xochitl in tonequimilol çan yo in cuicatl ic huehuetzintelel ain tlpe. a ohuaya ohuaya.

Y mach noca ompolihuz in cohuyotl mach noca ompolihuz ynic niuhyotl ynonoya yehua niyoyontzin ohuaye oncuicatillano ynipalnemoani ohuaya ohuaya.

Tineçahual coyotzin Moteuçcomatzin maocxonahahuiacan xoconahuiltican Dios ypalnemoani ohuaya ohuaya.

Ayçac on matia ompatonyazque oyeichano çanio o yenicán intinemico tlalticpac a ohuaya ohuaya.

Maxiuh quechxochitl a o çan tzinitzcan in malitoc oo in moçpac xochiuh çayeton moquimiloa çan titlato aniya tineçahualcoyotl a ohuaya.

Yn maya moyol iuhquimati antepilhuan o anquauhtla moçelo a moçhipanti tocnihuan acan cuelachic nican timochitoçazque o y yeichan o ohuaya.

Nitlayocoyay nicnotlamatiya çannitepiltzin nineçahualcoyotl huiya xochitica ye ehuan cuicatica niquimilnamiqui tepilhuan o ay noyaque yehua teçoçomocztzino yehuan quaquauhtzin a ohuaya ohuaya.

Ocnellnemoan quenonamican maya niquintocain intepilhuan huiya maya ni quimonitquili toxochihuh aya maic ytech nonaci yectli yan cuicatli teçoçomocztzin &.

O aye ompolihuz in moteyo nopiltzin titeçoçomocztzin ancaçaye in moçuic o ayea ni hualchoca y çannihualic notlamati conon tiya ehua ohuaya ohuaya.

Çan ni hualayocoya o nic notlamatia ayo quic oo ayoc quen namian titech yaitaquiuh in tlpe. y canontiya yehua ohuaya ohuaya.

Tlanel nichoca in yehuaya tlanic notlamatia yehuaya tla nel cenzaquen qui hual nequian noyollo ye ehuya cuix nella noyaz quennonamican huiya o ya hue yo ahuy yaohuia Tlpe. ahua yaohuaye quittoa toyollo macaictimiquini antocnihuan huiya can a mico huaya cuix ompa nonyaz huiya cuixompa nemi nota que nonamican huiya hui y xi hueya noyollo çanel an nipolihuz ninotolinia aya hue y yo ahua y yao huia.

Tictlalitehuac in moteyo tehua titepiltzin aintlacahuepantzin an caçanica ontlacotihua y anca çan yeixpani on nequetzalo y palnemohuani quixihuaquiuh nemoaquiuh aintlpea. ohua ya ohuaya.

Yn çan cuelachitzinea on netlanehuilo ymahuiço o ypalnemoani quixihuaquiuh ne mo aquiuh &.

Pantli nenelihu ye ehuya ixtlahuatl itecy itzimizquixochitl ne nepaniuhticac y inticalylhuil y tzetzeliuhticac y oncayenimia in tlaca huepantzin otic yttaco quinequia moyollo yehua in itzimiquiztla ohuaya.

Moteocuitlaehuauh chalchiuhtzetzeliuhtoc yeton moquimiloa yeton motlamachtia ayxtlahuatl ytecy otic ytaco ett^a.

Ocentlan in tomiquiz otitoloque yn tiçaca tecay onquiçan toteyo çantocan ohuellamatin ypalnemoani yn chimaltepetl yxpano ohuaye yeil huiçolo huan yeelteotl ay iao ya huaya ohuaya ohuaya.

Tlalli mocuepaya milacatzoa tlacochquiahuia yteuhtli motecay yn chimaltepetl ixpan ohuaye ett^a.

Oya noconic yn nanacaotli yanoyolinchoca nic notlamatin tlalticpac. oo, çan ninotolinia oya hueya yli yayie ohuaya ohuaya.

Çan nic hual elnamiqui y han na huia ha ni huelamatin tlalticpac. oo çan ni notolinia ohuaya ohuaya.

Nixiquitla miqiztli çaninotolinia quen nel noconchihuaz aya moya nelli ayantlayocoya ynahquahqualani ai yohuiya.

Yn ma nel quetzalteuh in nehuan in yetomani ohuaye manelye cozcateuh ne hua y ye toncate ohuaye ayamoyanelli ett^a.

Noconihuh noconihuh yeyaçonellin noconihuh çanitatoltzin çanictonto nequi yye-huaya yeica noconelnamiqui o a Maiuhtamanpolihui aytzcan toxochiuh a ohuaya ohuaya.

Macacocoya amoyollo yehua in amotlatoltzin antocnihua huyano iuhqui nicmati nouhuanquimati ohuaye yia ynehuaya ceppa ye yauh intonemiz ohuaya ohuaya.

Ce mil huitl ontiyahui ceyohual oximoa nicahuiya çantontiximatico çan ticlanehuico o yenian o intlalticpac. y may huian mayce Melle ymanton nemican xihualia mantoanhahuiacan manconchiuhtinemi inonqua qualantinemi yan tlatla hueya nicanhuiya Macemicac onne mia macaic on miquia ohuaya ohuaya.

Yntele tzo on nemian techtlatlatztinemi techon iztlacoa nican huia in tele tzomotolinia Maon nentlamati Macemicac on nemia.

Nochal chiuhteponaz noxiuhquechol iniquiçi nocoyapitzaya çayeniquah quauhtzin huiya onihualacic a o noniquetzacoya nicuicanitl ayio huiya.

Cuelca xonahuiacan y ma yahualmoquetza a yyollonic cocoa çanic ehua cuicatl y onihualacic &.

Maya moyollo motomay mayamoyollo huallaçitinemian tinechcocolia tinech miqitlani y nonoya yehuin onompolih y ancaçayo quic oo nocatihualyehocaz nocatihualyentlamatz çantinocnih ocayeniauh ocayeniauh yehua ohuaya.

Çanquitoa noyollo ayocceppayenihuitz aya ayocceppa niqiçaquiuh in huel yeccan intlalticpac oçayeniauh oçayeniauh &.

Quinehnequi xochitl çonoyollo ye ehuya çan noncuicanetlamati o çan noncui

ye yecoa intlaltiepac. y yeniquaquauhtzi huiya noconnequi xochitl ma nomac om-
maniqui ninentlamatia yo haye y ho ohua yhya ohuaya.

Çan nel patonyazque y naic timiquizque huiya maça nichalchihuitl inteocui-
tlatl o çayenonipitzaloz ni ma malihuaz intlattillan o çano yoliyo çaye niqua
quauhtzin ni notolinia y ho ett^a.

Çan netequitl y xo nahuiaca xon a ahuiaca antocnihua at amon ahuezque at
ahuela matizque tocnihua nohuaye ça niquiz in yectli xochitl y yectli yan cui-
catl y ahuy yao ahua yia yiaa ohuaya ohuaya.

Ayquin oxopan in quichihua yenica y ninotolinia ça yeniqua quauhtzin huiya
at amon ahuzque at ahuellamatizque tocnihua o ohuaye can ni cuiz in yectli
xochitl ett^a.

NICAN OMPEHUA TEPONAZCUICATL.

Tico, tico, tico toto, auh icontlantiuh cuicatl tiquiti titito titi.

Tolla naya huapallalli manca noça in mahmani coatlaquetzalli yaqui yacauh-
tehuac Naxitl topiltzin onquiquiztica yechoquililo into pilhua ahuy ye yauh
in polihuitiuh nechcan tlapallan ho ay.

Nechcayan cholollan oncan tonquicaya poyauhtecatitlan in quiya pana huiya
y acallan onquiquiz ticayechoquililon &^a.

Nonohualco yenihuitz yenihui quecholi nimamali teuctla nicnotlamatia oyah-
quin noteuc yehuitimalli nechya icnocauhya ni matlac xochitl ayao ayao o ay
ya y yao ay.

Intepetl huitomica niya yehocaya *axalihqueuhca* nic notlamatia *yehuayan* oya-
quin noteuc ett^a.

Yntlapallan aya mochieloca monahuatiloca yechochiztla oanca çaçanco ayao
ayao &^a.

Çantiyaolina yenoteuc yehuitimalli tinahuatiloaya yexicalanco o anca çä-
canco &.

Ay yanco ay yanco ayamo aye ay huiya ayanco ay yanco ayamo a ye ahuiya
que ye mamanz mocha moquiapana o queyemahmaniz motenc calla tic ya
yencauhqui nican tollan nonohualco ya y ya y yao ay.

Ynyequenti chocaya teuctlon timalon queyema maniz mochan &.

Yntetl inquahuitl o on timicuilotehuac nachcan tollan y ynon can inotontlatoco
Naxitl topiltzin y ayepoliuiz yemotoca yeic yechocaz in mo macehual ay yo.

Çan can xiuhcalliya cohuacalla yaynoticmatehuac nachcan tollan y inoncan
ynotontlatoco Naxitl topiltzin &.

Tico tico tico tiquitiquti quti quto. Canic mocueptiuh.

Ytlapapal xochicentli niyolaya nepapan tonacan xochitl moyahuaya oncuepon-
ti moquetzaco yanaya aya yeteoya ixpan tona a Santa Maria ay yo.

Atl ya yacuicaya çanquetzal axihuitl tomolihui yanaya yenitla chihual ycel-
teotl y ye dios aya ni ytlayocol aoya yehcoyaz &.

Çan catlacuilolpan nemia moyollo amoxpetlatl ypan toncuicaya tiqui monyai-
totia teteuctin aya in obispo ya çacatotatzin aya oncan titlatoa atlitempan ay yo.

Yehuan Dios mitzyocox aya xochitla ya mitztlacatili yancuicatl mitzicuiloa
Santa Maria in obispo ya &.

Toltecaihcuilihuia aha ayaha ontlantoc amoxtliya moyollo ya onaya mochon
ahciticac oo tolteçayo ota ycaya ninemiz yenican ay yo.

Ay ya nech cuiliz ac yenhuan oyaz onicaz a anni ihcuahuan aya y yan cui-
canitl y yehetl y noxochiuh non cuica yhuitequi onteixpa ay yo hueyntetl nictē-
quin tomahuacuahuitl nic ycuiloa yan cuicatl ytech aya oncan nomitoz inquen
manon incaniyaz nocuica machio nic ya cauhtiaz in tlaltiepac. y on nemiz noyol
çancayenican y ahuala y yancoya nol namicoca nemiz yenoteyo ay yo.

Nichocaya niquttoaya nicnotzanoyollo maniquittan cuica nelhuayotl aya ma-
nic ya tlalaquiya maicaya tlaltiepac. quimma mochihua on nenemiz noyol &.

Çancateuxochitl ahuiaca ypotocaticac mocepanoa yantoxochiuh ay ye ayao
huiyoncanqui ya itz molini yenocue celia notlatollaquillo o hua intoxochiuh
yeac y quiapani ayao.

Telcacaahuaxochitl ahuiac xeliuhtihuitz a ihpotocaya inahuiyac poyomatlin
pixahuia oncan nine nenemi nicuicanitl y ye ayao ohui yoncaquiya itzmolini
yenocue celia &.

Toco tico to Coto co tititico tititico çanicmo cueptiuh.

Huextzincayotl
vintendo los de hue-
xotzinco a pedir socorro
a moteneçoma o tlaxcalla.

Tlacuiloltzetzeliuhticac moyoliol timoteuçomatzic nic huicati huitz nictzetzelo-
tihuitz y o huetzcani xochinquetzalpapalotl noquetzaliçouhtihuitz nocon ihtotia
chalehiuh atlaquiquiz copa niya hueloncuica chalehiuh huila capitztl nictēocui-
tlapitza yaho aylaya ohaye ohuichile amiyacale.

Ohuaya yeon nic eehehuia moxochiuh aya ypalnemoani yehuaya Dios aya ili-
huan ca nahuiche nictzetzeloaya noncuicatilo ya hoy.

Tozmilini xochitl in noyol yol ay yahue tozmilini xochitl noteponaz ay an co
ayancayome oncana y ya hue nicxochiamoxtoz immanaya ytlatol ayanco ayanc-
ayome ho.